

傷寒直解三

傷寒論直解卷四

王元文燮巷

錢塘張錫駒令韶父註解

門人魏士俊子千校

徐旭升上扶

徐欽月昊若

王良能聖欽

叅訂

男

漢倬雲爲

校

漢位譽皆

辨陽明病脉證篇

問曰。病有太陽陽明。有正陽陽明。有少陽陽明。何謂也。答曰。太陽陽明者。脾約是也。正陽陽明者。胃家實

是也。少陽陽明者。發汗。利小便已。胃中燥。煩實。大便難是也。

陽明者。二陽也。太少在前。兩陽合明。謂之陽明。故有太少正陽明之病也。約窮約也。陽明之上。燥氣治之。本太陰脾土之中。脾爲孤藏而主津液。今兩陽併于太陰脾土之中。脾爲孤藏而主津液。今兩陽相鑠。陰液消亡。不能灌溉。困守而窮約也。所謂太陽陽明者是也。天有此燥氣。人亦有此燥氣。燥氣者。陽明之本氣也。燥化太過。無中見太陰濕土之化。此陽明胃家自實。所謂正陽陽明者是也。夫汗與小便。皆胃府水穀之津。少陽相火主氣。若發汗利小便。則相火愈熾。而水津愈竭。故胃中燥實而大便難。火盛則煩。所謂少陽陽明者是也。○陽明有太少正三者之分。以陽明從太少而生也。

陽明之爲病。胃家實是也。

此復申明正陽陽明之爲病也。正陽陽明者。陽明之本氣也。本氣者。燥氣也。燥氣盛于上。則胃家實于內。故言陽明燥氣之爲病。胃家實是也。

○問曰。何緣得陽明病。答曰。太陽病。若發汗。若下。若利小便。此亡津液。胃中乾燥。因轉屬陽明。不更衣。內實。大便難者。此名陽明也。

此承上章太陽陽明病而言也。蓋太陽之津液。生于胃府。水穀之津。太陽病。若發汗。若下。若利小便。皆所以亡胃府之津液也。津液亡。故胃中乾燥。因而轉屬于陽明。遂不更衣。陽明內實。大便難者。此太陽轉屬陽明而名陽明也。○古人  
大便必更衣。故不更衣。爲不大便也。

問曰。陽明病。外證云何。答曰。身熱。汗自出。不惡寒。反



惡熱也。

夫陽明之氣亦從胸而出于膚表。故又問外症云何。身熱者。陽明燥熱之氣蒸蒸而發也。汗自出者。陽明水穀之津。溱溱而出也。陽明之上。燥氣主之。故不惡寒。反惡熱也。

問曰。病有得之一日不發熱而惡寒者。何也。答曰。雖得之一日。惡寒將自罷。卽自汗出而惡熱也。

此承上文而言。不惡寒反惡熱者。陽明病也。今有得之一日。不發熱而惡寒者。乃病邪在表。而未化熱也。然雖得之一日。寒將罷而化熱。故卽自汗出而惡熱也。

問曰。惡寒何故自罷。答曰。陽明居中土也。萬物所歸。無所復傳。始雖惡寒。二日自止。此爲陽明病也。

此復設問答以明惡寒自罷之故也。陽明位居中土。為萬物之所歸。凡內外之邪。皆可入于陽明。一歸中土。無復出理。故無所復傳于別經也。始雖惡寒者。以一日在表。表氣通于太陽也。二日陽明主氣。正邪之氣俱歸陽明。故惡寒自止。此為陽明病也。○此借問答以明陽明之無所復傳。非若別經之有復傳也。

本太陽病初得病時。發其汗。汗先出不徹。因轉屬陽明也。傷寒發熱無汗。嘔不能食。而反汗出濇濇然者。是轉屬陽明也。

上文歷言陽明本經之自為病。此復申明太陽轉屬陽明之義。以見陽明有自病轉屬之不同也。上文言亡津液而轉屬也。傷寒發熱無汗者。病在太陽也。液而亦能轉屬也。傷寒發熱無汗者。病在太陽也。

嘔不能食者。胃氣不和也。不因發汗而反汗出。澀澀然者。動其水穀之津也。水津外泄。則陽明內虛。是以轉屬于陽明也。王繹堂問曰。亡津液而胃中燥。因轉屬陽明固已。若汗出不徹。津液不亡。何以亦轉屬陽明耶。荅曰。汗者。陽明之陰液也。汗出不徹。則陽明燥熱之氣。不得隨汗而泄。太陽之標熱。反內合其燥氣。故因而轉屬也。

### 傷寒三日。陽明脉大。

三日少陽主氣。今傷寒三日。而陽明脉大者。邪歸甲土。無所復傳。故雖三日少陽主氣之期。而仍現陽明之大脉也。○自此以上六節。論陽明之氣主表而外合太陽。主裏而內生津液之義也。

○傷寒脉浮而緩。手足自溫者。是爲繫在太陰。太陰者。身當發黃。若小便自利者。不能發黃。至七八日大

便鞭者。爲陽明病也。

此二節明陽明與太陰爲表裏之義也。夫陽明脉大。今脉浮而緩。陽明身熱。今手足自溫。此不在陽明而繫在太陰也。太陰者濕土也。濕熱相併。身必發黃。若小便自利者。濕熱得以下泄。故不能發黃。夫繫者。虛繫而不實也。可繫於此。而亦可繫于彼。至七八日。陽明主氣之期。亦可繫于陽明。故大便鞭者。爲陽明也。以見太陰陽明之氣。相爲表裏。而太陰陽明之邪。亦可交相爲繫者也。

傷寒轉繫陽明者。其人澀然微汗出也。

此承上文大便秘鞭爲陽明病而言也。言太陰之傷寒轉繫于陽明。不特其人大便秘鞭。而且澀然微汗出也。

○陽明中風。口苦。咽乾。腹滿微喘。發熱惡寒。脉浮而



緊若下之。則腹滿小便難也。

此言陽明之氣。不特與太陰爲表裏。抑且中。少陽。外合於太陽也。陽明中風。不涉于本氣。又燥化而涉於少陽之熱化。故口苦咽乾。復涉太陰之濕化。故腹滿微喘。又涉太陽之寒化。故發熱惡寒。以風邪而入于裏陰。故脈緊。復外合于太陽。故浮而緊。浮宜外解。若下之。則太陰脾土不能轉運而腹滿如故。少陽三焦不能決瀆而小便難也。

○陽明病。若能食。名中風。不能食。名中寒。

夫胃爲水穀之海。倉廩之官。故此三節。以食而論陽明之氣焉。胃爲陽土。風爲陽邪。以陽邪而傷陽。兩陽相得。故能食。寒爲陰邪。以陰邪而傷陽。陰寒閉隔。故不能食。○風能鼓動陽明之氣。故能食。寒能閉拒陽明之氣。故不能食。

陽明病。若中寒者。不能食。小便不利。手足澀然。汗出。此欲作固瘕。必大便初鞭。後溏。所以然者。以胃中冷水穀不別故也。

此論陽明中寒。陰寒甚而不得本氣燥熱之化也。蓋言陽明病若中寒者。不但穀不消。而不能食。抑且水不化。而小便不利也。四肢爲諸陽之本。胃陽虛。津液泄。故手足澀然。汗出。固。固。冷也。瘕。瘕。聚也。言沉寒固冷。欲假氣成形而作瘕聚也。初鞭者。燥氣主之也。後溏者。寒氣乘之也。所以然者。以胃中冷。穀不消。而水不化。水穀不別故也。

陽明病。初欲食。小便反不利。大便自調。其人骨節痛。

翕翕如有熱狀。奄然發狂。濇然汗出而解者。此水不

勝穀氣與汗共併。脉緊則愈。

此論陽明中風。陽氣甚而不得少陰之癸水以濟之也。陽明病初欲食者。陽氣甚也。夫病在陽明小便當利。大便當燥。今反不利而自調者。津液尚還入于胃中。但不得少陰之癸水以相合也。少陰主骨節。少陰不得上合於陽明。故翕翕如有熱狀也。奄忽也。兩火合併而為陽明。故翕翕如有熱狀也。奄忽也。漑汗出貌。言忽然發狂。漑然汗出而解者。此少陰癸水之陰氣。不勝陽明穀神之陽氣。與汗共併于中。故奄然而漑然也。脉緊則愈者。緊則為陰。陰氣復而陽氣平。戊癸合矣。

陽明病欲解時。從申至戌上。

此言陽明病解之時。作一小結也。日晡而陽氣衰。陽明之所主也。陽明旺於申酉二時。病氣得天時之助而解。故欲解時。從申至戌上也。

○陽明病不能食。攻其熱必噦。所以然者。胃中虛冷故也。以其人本虛。故攻其熱必噦。

此章凡三節。論陽明中氣虛寒。食氣入胃。不能滯精于經脉。輸精于皮毛。而為病也。此言中氣虛寒也。夫胃氣實則能食。虛則不能食。今陽明病不能食者。胃氣虛也。反攻其熱。既虛且寒。故必噦。噦者呃也。所以然者。以胃中虛冷故也。又申言人以胃氣為本。其人本虛者。胃氣虛也。故攻其熱必噦。

陽明病。脉遲。食難用飽。飽則微煩。頭眩。必小便難。此欲作穀瘕。雖下之。腹滿如故。所以然者。脉遲故也。

此言胃氣虛。不能滯精于經脉也。本經曰。傷寒三日。陽明脉大。今陽明病。脉遲者。經脉不能稟氣于胃也。經脉別論口。食氣入胃。濁氣歸心。滯精于脉。脉氣流經。是食由胃而歸于心。由心而滯于脉。流



于經也。故食氣散達於經脉之中。自不厭其飽。若不能散達。俱留滯于胃。故食難用飽。飽則濁氣歸心。不能滯于脉。流于經。故微煩也。不但此也。不能循經而上行。則頭眩。不能循經而下行。必小便難。不能循經而留于中。則欲作穀痺瘕黃也。此胃氣不能橫充而旁達。故雖下之。而腹滿如故。所以然者。以胃虛不能滯精于經脉。脉遲故也。

陽明病。法多汗。反無汗。其身如重行皮中狀者。此久虛故也。

此言胃氣虛。不能輸精于皮毛也。身熱汗自出者。陽明病也。故陽明病。法多汗。今反無汗。其身痒如重行皮中狀者。此胃氣久虛。不能輸精于皮毛故也。經曰。輸精皮毛。毛脉合精。行氣于府。以是知內而經脉。外而皮毛。皆稟氣于胃者也。胃氣一虛。皮毛經脉。俱無所稟而病矣。所謂以胃氣爲本也。三

節之意  
如此

○陽明病。反無汗而小便利。二三日嘔而欬。手足厥者。必苦頭痛。若不欬不嘔。手足不厥者。頭不痛。

此章凡四節。論陽明居中土。主灌溉于上下。內外四旁者也。此言陽明之氣。含肺而上逆于頭。不能灌溉于四旁也。陽明病。反無汗而小便利者。津液不得外達。而惟下洩也。津液洩于下。則虛氣逆于上。故二三日嘔而欬。四肢不得稟水穀氣。故手足厥。夫嘔而欬。手足厥者。陽明之氣。不能橫充。惟逆于上。故必苦頭痛。若不欬不嘔。手足不厥。陽明之氣。橫充而四達。不逆于上。故頭不痛。○嘔者。胃病也。欬者。肺病也。肺腕與胃腕相連。故欬論曰。聚于胃。鬲于肺。然不特肺胃相連。陽明燥金也。肺寒金也。皆主秋金之氣。故此二節皆欬。

陽明病。但頭眩。不惡寒。故能食而欬。其人咽必痛。若不欬者。咽不痛。

此言陽明之氣。合肺而上逆于咽。不得流通于下也。陽明病。但頭眩者。風虛掉眩也。不惡寒者。感陽明燥熱之氣也。陽明中風。故能食。風邪傷肺。故能食而欬。咽爲胃府之門。肺氣由之而出。欬極則傷。故其人必咽痛。若不欬者。肺氣不病。無傷于咽。故咽不痛。

陽明病。無汗。小便不利。心中懊懣者。身必發黃。

合下節。論陽明之氣。鬱于中土。不得外達而下輸也。陽明之氣。不得外達于皮毛。故無汗。不下輸于膀胱。故小便不利。惟鬱於中土。故心中懊懣。無所發洩。故身必發黃。此氣不輸而爲濕黃也。

陽明病。被火。額上微汗出。而小便不利者。必發黃。

上節論濕黃。此節借被火以論濕熱發黃也。陽明病。濕熱病也。復被火。則濕熱因火而盛。上蒸于經脉。陽明之脉交額中。故額上微汗出。又不得下洩。故小便不利。濕熱相黥。亦必發黃。以是知陽明之氣。主灌漑于上下。內外四旁之間。而不得鬱于中土者如此。

○陽明病脉浮而緊者必潮熱發作有時。但浮者必盜汗出。

此三節論陽明主裏復外。谷于表氣。內通於經脉。復還于胃中也。浮爲表虛。緊爲裏實。潮熱者有時而作。如潮之有信也。陽明病脉浮而緊者。表邪入裏。陽明裏實。故必潮熱。發作有時也。若但浮而不緊者。此陽明表虛也。人卧則血歸于肝。表陽虛于外。陰血歸于內。兩不相顧。故睡中汗出。如盜賊乘人之不覺而竊去也。



陽明病。口燥。但欲嗽水。欲嚥者。此必衄。

此言陽明之津液通于經脈。而爲衄也。陽明病口燥者。病陽明之燥氣也。燥熱在經。故但欲嗽水。不在於胃。故不欲嚥。熱甚而經血妄行。故必衄也。經曰胃主血。所生病者。衄衄是也。

陽明病。本自汗出。醫更重發汗。病已差。尚微煩。不了了者。此必大便鞭。故也以亡津液。胃中乾燥。故令大便秘。當問其小便。日幾行。若本小便日三四行。今日再行。故知大便不久出。今爲小便數少。以津液當還入胃中。故知不久必大便也。

此言陽明之津液。復還于胃中也。陽明病本自汗出。津液外泄也。醫更重發汗。津液竭矣。病已差者。